

Jud

O bolobolo ke boloin Jud

No bolobolo tang Jud

No bolobolo Jud o puhina ro bolobol i lolono toro Baeboul tar timuhur uelhote. A tamata ke bolo tang roono te Jud, inggon a tahina pono Iesu.

Jud ke bolo toro bolobolo rone tar uatagin tasir tamatang tagorong mana tasir gisiameher tamat. O tamatasina ra uangoul haraha tar niuangoul uasa.

Jud ke mene uakalahara pare God e turung uabatompe tasisin.

Doh Jud ke mene uampopokoho tasir tamatang tagorong mana tar tagorong mana dedempe tang God.

I lolono toro bolobolo rone:

A meneng uakalahar 1-2

A nipiles, a niualasir, kara nisang tasir tang ualasira bohoboh 3-16

Pentampopokoho tar uoho uanono tar nitagorong man 17-23

Lotu keip tar uatakai 24-25

Jud e heir tar niuaha tasir tamat

¹O uelhire rone o la tur tang Jud, inggono na tamatang kalekinale Iesu Kristo, kara tahina Jems. Inngo ku bolo tang roono rone tas mais uakapa tun, ke kilais God tamagigeig tar nimalaelhirir nan gera uangoul tar nikaueker nang Iesu Kristo. ²Inngo u lotu tang God mare heir tamiuoum tar uleikir niueldolom, o hiarou, kara nimalaelhir.

A uatagin tar giniamehe siokor ualasir

³Inggoum ro bung kaloug, inggo ku namanantiehe tunumpe tar bolome tamiuoum tar uahire tar haua ke uauheil tagigeig. Gine daan inggo ku bolome tamiuoum tar giamehe siokor inet, inggo u uatampopokoho tun tamiuoum tar tur keip toro uelhire ro man. God ke heir toro siokon sioun

^a 1 Mat 13.55

ro uelhire ro man tosno tamata dedeil, ahik pahe matotong uapalih. ^{4b}Ge o gisiamhe per tamata ke me bir uoumis geka bolo uahiua peinir puhono sioun. Gisina ka me uahiku uanomo kompemeis tamiuoum. O tamatasin ahik mes nitagorong mana tagu tang God ka uapalih tar hamhamas ger nana nagi Godeig, kara uauia tasir tamata tar ura ueltebeir, kara uolih tang Iesu Kristo ger tang siokon sioun nagi toiaieg, kara Tamata Noman.

⁵Inggomung mung ateng sioun inggo u marang uanamana puk tamiuoum pare, a Tamata Noman ke uelkarus tur tasir tamatang Israel uakapa tun i Isip, bo i muduhia puk inggono ke mamantouo tas mais ahik pah ka tagorong mana dede tagu. ^{6d}Mung namana tapokis kompe tasir angelou ge ahik pah ka tur uanono keip tar kauk, ka ualo liu pono tonosio uan, a Tamata Nomana ke uamoko tasisina tar butur kitupun, kare sanga tane tasisina tar tiein gere moko dedengua e tuka tar binakang kedanga tar marein ger uleik tun. ^{7e}Te misiana komper hagarono tasir tamatang Sodom, dohi Gomora, kare toro uan uleik uilohonine ka heir katongois toro uraur, kare tar hagar uasa. Gisina tera banga tonguais tas mais geka kale uelmahing tar puhung barah toro hue gero luh dede i Hel.

⁸Doh ter siokono sira komper hagaron tasir tamatasina ra borboriana tar inete gere guata uasa katongo tar tukunusisin, kara ueluelde tar nikaueke ger nanar Tamata Noman, kara menmene uasa tas mais gesir uelpipih gera uangoul i ran i Heuen. ^{9f}Bo tar binaka kura uelperere Maikoul ge nas uleikir angelou me Satan tang mai re kale tar tukununa Moses. Maikoul ahik pah ke menmene uasa tagu tang Satan, bo ke hire kompe tang Satan pare, “A Tamata Noman e loulouara totomua!” ^{10g}Doho tamatasinasine ra menmene uasa tun harahampe tar huar inet, ahik pah ra naman manatein, kara guata kompe tar haua ra marang guatain misiana tasir inetesiner roke ter niguataninanine ke mamantouontiehe tun tasisin. ^{11h}Kuasalik, God e turung heir tar uleikir uelmahing tun tasisin! Ka uakeluk pe tena niguata Ken, kara tang inete to tang Balam. Gisina ka mamantouois ngohina tang Korah ke mahang longoro pe tang Moses.

¹²ⁱO tamatasin misiana tar lolouo ger ualasokor. I lolono toro nieining uah, gisin o mahang matal, o tang kauk ra marang gono kompe tar mamang inetelik. Gisina misiana pono tar mahar langit ge ahik pahe dur gere u bise liuigir rom. Gisina misiana ponor inua ge ahik pahe uoto ua tagu tena binak, kare misianar douk geke kahuhur, kare matmata

^b 4 Gal 2.4; 2Pi 2.1 ^c 5 KT 12.51; Aha 14.29-30 ^d 6 2Pi 2.4 ^e 7 Uak 19.1-25; 2Pi 2.6,10
^f 9 Dan 10.13,21; 12.1; Sek 3.2; 2Pi 2.11; UGO 12.7 ^g 10 2Pi 2.12 ^h 11 Uak 4.7-8;
 Aha 16.1-35; 2Pi 2.15; 1Jo 3.12 ⁱ 12 2Pi 2.13,17

hihir tunungua. ¹³Gisina misianar butuana roke i laur, doh res niguata uasasinaniner ualamatala ke puraka sir tar peroper. Gisina ra uangoul sira tar pitopit gere uana ueltebeir puk i rana tar langit. Gisina ra turung uangoul dede tar butur kitupun geke umatotoin God tasisin.

¹⁴Jnok a propet ter uamouitina toso bunguna Adam teke mene tanika sioun tar puhonene ke pokoso manasa tasir tamatasin,

“Bang, A Tamata Noman gine re lame
menia toсно tamata gesir dedeil o burehentiehe tun o mahang ah.

¹⁵Inggon e me kedanga tasir tamata uakapa tun,
kare kout luaka tenas nipileser tamata uasantiehe tun tasir tamata
uasa,
geka guata keipig tar hagar ger sa,
kara menmene uasa geka meneigir tamata ge ahik pah ra uakeluk
tang God,
kara menmene uasa tatanon.”^k

¹⁶Gisinar tamatasina ra korere kompe, kara boho tola tasir gisiameh. Gisina ra uakeluk kompe teres ninaman, kara nimalaraniner sa. Gisina ra uairana katongo kompeis, kara uahihiana tasir tamata mara kale me bureher inet.

A uahire tar tur uanono dede

¹⁷Ro bung uanoutoug, namana dede tar haua ra hireig no aposoul Iesu Kristo, ¹⁸gisina ka hire tamiuoum pare, o tamat ra turung uelualeng uasa tar Tamata Noman menia tasir tamata gera tagorong mana tatanon, kara uakeluk kompe teres nimalara katongonine re deig God. ¹⁹Gisina tera turung uaelueltageih ueltebeir tamiuoum, ge gisina pe ra uakeluk kompe tar haua re uauaha tar tukunus katong ahik me Iabena Dedeil re moko tasisin.

²⁰^mBo inggoum ro bung uanoutoug, mung uatampopokoho dedempesioum teremi nitagorong maneitir dedeilintiehe tun, karung lotu keip dede tar Iabena Dedeil.

²¹Uamoko katongo dedempesioum tar nimalaeluhirir nang God, karung uanguangoul tar niueldolomo ger nana nagi Tamata Nomaneig Iesu Kristo gere keip tamiuoum tar nitua gere moko dede. ²²Ueldolom, karung guata uaia tas mais ahik pah ra tagorong mana dede tagu.

²³ⁿUelkarus tur tasir gisiameh toro hue, karung uauedeil tasisin. Ueldolomo tasir gisiameh, karung guata uaia keip tasisina tar nisokor, bo

^j 14 Uak 5.18,21-24 ^k 1.15 Bolobolo Inok 1.9 ^l 18 2Pi 3.3 ^m 20 Kol 2.7 ⁿ 23 Sek 3.2;
UGO 3.4

mung kapil pukusioum tenas niguata uasasina gete sairisioum, karung sa pon.

Inggeig i uatakai tang God

²⁴God tere matotong kaueke uaia tun tamiuoum, maeit ahik pah mung matotong kouh tar sisiokong niguata uasa, kare uadelauana tun tamiuoum, kare keip tamiuoum i uoum tar niuahantiehe tun, kara uinatoror nan. ²⁵°Inggono ter tang sioko manasamper God nomana tun geke uaudeil tagigeig ke tangana pe tar tun Iesu Kristo nagi Tamata Nomaneig. A uinator a uelpipih, a nitampopokoh a i ranantiehe tun, kara nikauek e la tur tatanono sioun, gine daan, doh tar mamang binakalik. O Mana tun.

° 25 Roum 16.27; 2Pi 3.18